

## TAITO

### Faulo yana kiluma Taito 'waineye.

Taito kebu tomogo Diu, Faulo yana lau'age 'wainega i vetumagana Iesu Keliso 'waineye. Faulo yana lau'agevuvua 'waineye Taito 'ana 'weabu taiadi i lalauvivila. Tomata'aulelevo yadi va'auta bwaikina 'waineye Taitonina Faulo taiadi i nago Ielusalema. (Folova 15:2) Faulo Taito i vetunei i nago Kolinita tutuya 'ailuga. (2 Kol. 7:6-7, 8:6,16) Mulieta Faulo Taito i voneni tovetumaganavo i na 'isave'avinidi Imula Kiliti 'waineye, (Taito 1:5).

Leta de'e nageneye i veifufu Taito 'waineye tovetumagana 'adi to'edakumetavo 'adi venua'ivina faifaina, i matakia tove-kekavekali faifaidi, i awave'ede'edeni yana ve tovetumaganavo 'waidie faifaina wata i ve 'waineye ava'ai sauluvaga tovetumaganavo 'adi laubwaina. De'e letanina 'ana 'idi side bani'odi.

Faulo i vekaiwa Taito 'waineye. 1:1-4

Tovetumagana 'adi to'edakumetavo. 1:5-16

Ve tovetumaganavo 'aila'a tulina tulina faifaidi.

2:1-15

Sauluva 'atumaidi tulina tulina faifaidi. 3:1-11

Faulo yana vona 'ifwaidi wata yana 'alanuai.

3:12-15

**1-2** Yau Faulo, Yaubada yana tofolova wata Iesu Keliso yana tomata'aulele a vekaiwa Taito 'waimuye.

Basenadi Yaubada i venua'ivineku i vetuneku bega tomotoganidi i venua'ivinediga a na

'ivaisedi i na vetumagana Keliso 'waineye. Wata i venua'ivinekuga Yaubada yana nuanua tonovidi a na ve 'waidie bega yadi sauluva i na tonova Yaubada yana nuanua bani'odi, wata i na nuani mogitana i na vetumagana 'awaie mia 'atumaina wata miamia-vagaina i na veluagai. Mogitana miamia-vagaina i na veluagai fai basenadi Yaubada fwayafwaya kebu i da 'idewaiga, i vona'awaufaufa ta na veluagai, kebu i da vekaliedaga.

<sup>3</sup> Valanina mia 'atumaina wata miamia-vagaina faifaina basenadi kebu tamu aitoi i da 'asetaiga, siwe tutuyanina Yaubada nuanuana, bei i sivemageseni Iesu Valana 'Atumaina 'wainega. Yaubada 'ada To'ita'ita'i i vetumaganeku Valanina i 'aniveleneni 'waikuye bega yana veimea 'wainega faifaina a lulu'ivona.

<sup>4</sup> <sup>☆</sup>A kilukiluma Taito 'waimuye, 'omu yau taiadi ta vetumagana Keliso 'waineye bega a ve'awanatuna 'waimuye. A vevelu'ui faifaimu, nuanuaku Yaubada Tamada wata 'ada To'ita'ita'i Iesu Keliso ma yadi nuakalikali i na vevesauluva 'atumaina 'waimuye wata nuanua bikadi mia 'atumaina taiadi i na veleveleemu.

### *Taito yana folova Imula Kiliti 'waineye.*

<sup>5</sup> 'U na nuani ava'ai basenadi a vonemu tutuyanina Imula Kiliti 'waineye a valovemu. A vonemu folovanidi kebu a da ve'a'avadiga 'u na 'idewadi wata to'edakumeta 'u na venua'ivinedi tovetumagana 'adi 'aila'a 'atamana 'aitamogana 'aitamogana faifaidi.

<sup>6</sup> <sup>☆</sup>'Al'edi nuanuamu tamu tomogo i na

---

<sup>☆</sup> **1:4:** 2 Kol 8:23    <sup>☆</sup> **1:6:** 2 Tim 2:24-26

veto'edakumeta Iesu yana 'Aila'a 'waidie, i lubwaineni yana sauluva 'atumai'avadi, 'ai'edi nagingina, yana vavine 'aitamogadi taiadi i na miamia. Natunavo i lubwainedi taunidi tovetumagana Keliso 'waineye, wata kebu tamu 'adi 'eba awavesako bani'odi bunu 'ana nuanua sakoidi, wata kebu tovemata'wana'wana.

<sup>7</sup> <sup>◊</sup>Fai to'edakumetanina Yaubada yana folova i na 'i'isave'avini, i lubwaineni yana sauluva 'atumai'avadi, taunina kebu tonualaka, kebu i na nuasako-matayo'oga, kebu ufa toketokena i na toke i na yemuga, kebu i na vevetalagaga, wata kebu kukua 'adi nuanua 'waineye i na vebwaika.

<sup>8</sup> We'e mogitana i lubwaineni wakawaka i na veve'isabodedi wata nani 'atumaidi i na nuakalikaliedi. Taunina tovenua'ivina 'atumaina, yana sauluva tonovidi wata magemagetadi Yaubada mataneye, wata taunina yana sauluva i na 'i'isave'avinidi 'atumaina.

<sup>9</sup> Iesu Valana 'Atumaina 'waineye i na tovotovoi fa'alina, Valananina ta ve'awamogitaneni bega yada vetumagana ta yatoi 'waineye wata yada ve taiadi i vesala. Bani'odi i na vevesauluvediga tomotoga 'ifwaidi i na kiavefa'alidi wata i na kiavesosoanidi ve tonovidi 'waidiega wata venina 'ana tovedumwe'ai'ai yadi vekali i na sivemagesedi.

### *Tove-vekavekali Taito i na talabodedi.*

<sup>10</sup> I lubwainemu to'edakumetavo 'atumaidi 'u na venua'ivinedi fai tomotoga fuedi tovemata'wana'wana wata to'abigeku tomotoga i vevekaliedi, we'e mogitana me Diu 'ifwaidi i

---

<sup>◊</sup> **1:7:** 1 Tim 3:2-7

vetumaganaga Keliso 'waineye yadi nuanua i vo, 'Ai'edi 'wa na luku Iesu yana 'Aila'a 'waineye, nagami 'ima me Diu yama veimea 'wa na vematayakeyakedi."

<sup>11</sup> I lubwaineda ta na talabodedi fai tomotoga 'ifwaidi ma yadi 'aila'avo yadi vetumagana i 'ivemweadi yadi ve 'waidiega. Kebu i da lubwainediga bani'odi i na veve, nuanuadi mani bwaikina i na veluagai yadi venina 'wainega, 'eba bunumayaga.

<sup>12</sup> Imula Kiliti 'waineye 'u miamiaga, tamu tau-nidi yadi tomotoga, taunina yadi tolu'ivona base-nadi i vo, Me Kiliti tutuya matatabuna taunidi tovekali, 'aisaya kasikasisidi bani'odi nuanuadi tomotoga vita i na veleveledi, tovedumwe'ai'ai, 'awadi bwalabwalaidi."

<sup>13</sup> Ava'ai i voneyeniga, vona mogitana begaidi i lubwainemu 'u na toke 'u na talabodedi bega kebu i na 'ivemweamweadiga yadi vetumagana i na yatoi fa'alina.

<sup>14</sup> Wata 'u na talabodedi bega kebu taunidi i na tauyedi ifuifufu-vekavekali 'waidie me Diu tubudiavo 'waidiega, wata veimeanidi i sousouyedi Yaubada yana nuanua tonovidi 'ana tovedumwe'ai'ai 'waidiega, kebu i na ve'awamogitanediga.

<sup>15</sup> Egavo yadi nuanua magemagetadi, nani matatabuna 'waidie magemagetadi, we'e egavo yadi nuanua 'oka'okadi wata taunidi kebu tovetumaganaga, nani matatabuna 'waidie 'oka'okadi fai yadi nuanua 'akonadi i sako, kebu 'adi fata 'adi vebae 'waidie i na lutonovi i sakosakona 'alo kebu.

**16** ✝I vonavona i vo, 'Ima Yaubada 'a 'asetai, taiadi 'a veiana," siwe yadi sauluva 'waidiega ta 'asetadi i vevekali. Taunidi tovemata'wana'wana, kebu 'adi fata tamu nani 'atumaina i na 'idewaiga, i ve'eduogaogala.

*Ve 'au'auveadi wata mo'amo'aivo faifaidi.*

## 2

**1** We'e 'omu, sauluvanidi ve tonovidi taiadi i vesalaga, i lubwainemu faifaidi 'u na veve.

**2** 'Au'auveadi 'u na vonedi kebu i na vemwasosoai-'avo'avovo we'e yadi sauluva i na 'i'isave'avinidi, yadi nuanua i na tonova bega ma 'adi ve'ililibu, wata i na vevenua'ivina 'atumaina. Kebu i na 'ivemweamweadi, yadi vetumagana i na yatodi fa'alina, yadi nuakalikali i na vebwaika wata i na tokemaigedi vita 'waidie.

**3-4** ✝Wata bani'odi mo'amo'aivo 'u na vonedi bega yadi sauluva matatabuna magemagetadi, kebu i na vebonaivo wata ufa toketokena kebu nuadi i na 'ewadi. I lubwainedi yadi ve 'atumaidi 'waidiega vevine tubuvauvau i na ifufudi bega yadi lalamogavo wata natudiavo i na nuakalikaledi.

**5** 'Adi veifufu 'waidiega i na vevenua'ivina 'atumaina, kebu i na sakonaga, i na folofolova 'atumaina yadi vanuga nagedie, ma yadi nuakalikali i na ve'ivaivaita wata yadi lalamogavo i na vematayakeyakedi. 'Ai'edi bani'odi i na vevesauluvediga, kebu tamu aitoi Yaubada yana Vona i na awavesakoyeniga.

---

✝ **1:16:** 2 Tim 3:5; 1 Ion 1:6, 2:4    ✝ **2:3-4:** Efe 5:22

*Ve tubuai faifaidi.*

**6** Wata bani'odi iaveta tubuauvau 'u na ifufudi bega yadi sauluva i na 'i'isave'aviniidi.

**7** <sup>☆</sup>We'e 'omu taunimu yadi 'eba 'isa bega i lubwainemu nani matatabuna 'waidie yamu sauluva 'atumai'avadi. Kebu vekaliega 'u na ve, we'e yamu vona tonovidi 'waidiega tubuauvaunidi i na ve'ililibuyemu.

**8** <sup>☆</sup>'Ai'edi yamu venidi 'adi nogaya tonovidi, kebu tamu aitoi 'ana fata i na 'amalakibuyemu, we'e 'amu gaviavo i na bunumayaga fai tomotoga i na 'asetadi i vevevita-maimaigida.

*Ve tofolova faifaidi.*

**9-10** <sup>☆</sup>We'e tofolova-maimaiga i vetumaganaga i lubwainedi 'adi toveimeavo i na veematayakeyakedi wata yadi folova matatabuna 'waidiega i na kiavesosoanidi. Ava'ai i na vonediga kebu i na awaveugadiga wata kebu 'waidie i na vainago. Mogitana i lubwainedi yadi sauluva matatabuna 'waidiega tomotoga i na 'asetadi taunidi tomotoga 'atumaidi ma 'adi vetumagana wata todumwebika, nika 'wainege tomotoga venina Yaubada 'ada To'ita'ita'i faifaina i na awave'atumaieni.

*Iesuiyavuda bega ta na vevesauluva 'atumaina.*

**11** I lubwineda matatabuda yada sauluva i na ve'atumai fai Yaubada yana 'anivelena-maimaiga i sivemageseni 'waideye, nuakalikalinina 'ita'ita'i miamia-vagaina tomotoga matatabuda faifaida.

12 <sup>◊</sup>Nuakalikalinina i vedā, Yaubada nuanuana bunu 'ana nuanua wata fwayafwaya 'ana nuanua sakoidi ta na bailedi, bega tutuyanina ta na miamia fwayefwayeye yada sauluva ta na 'i'isave'avinidi wata yada mia matatabuna tonovidi Yaubada yana nuanua bani'odi.

13 <sup>◊</sup>Mogitana yada sauluva i na tonova fai ta lulukamata ta nuani mogitana tamu 'aiata 'eba sosoana bwaikina i na souyen'i 'waideye. 'Aiatanina 'waineye Yaubada Bwaikina, taunina 'asa'aiana 'ada To'ita'ita'i Iesu Keliso, ma yana 'ai'aiwabu mataududulina i na le'wa.

14 <sup>◊</sup>Taunina i tauyeni faifaida, yana wafa 'wainega i yavuda sakona matatabuna 'waidiega wata i 'ivevunavunagida bega 'ida taunina yana tomotoga mogitana, ma yada sosoana nuanuada nani 'atumai'avadi ta na 'i'idewadi.

15 <sup>◊</sup>Naninidi a veifufuyediga, nuanuaku faifaidi 'u na veve. Yamu veimea toketokena 'wainega tovetumaganavo 'u na kiavefa'alidi wata 'u na kiavesosoanidi, we'e tovemata'wana'wana 'u na toke 'u na vonedi. Taunimu 'u na 'i'isave'avinimiu nika kebu tamu aitoi i na awaobuobuyemu.

### 3

#### *Tovetumagana 'ada awave'eda'eda.*

1 <sup>◊</sup>Wata nuanuaku tovetumaganavo 'u na vonevonedi bega kebu nuadi i na fani, i lubwainedi toveimea wata gabemani bonadi i na noganogaidi, i na vematayakeyakedi wata folovanidi 'atumaidi 'waidie i na tauyedi.

---

<sup>◊</sup> **2:12:** 1 Ion 2:16; Efe 1:4    <sup>◊</sup> **2:13:** Fil 3:20    <sup>◊</sup> **2:14:** 1 Fit 2:9; Efe 2:10    <sup>◊</sup> **2:15:** 1 Tim 4:12    <sup>◊</sup> **3:1:** Lom 13:1-7; 1 Fit 2:13-14

**2** ☩'U na vonedi kebu tamu aitoi i na vebonaivoyeniga we'e mogitana yadi sauluva i na bika wata i na veveiana, tomotoga matatabudi matadie ma yadi nuaobu.

**3** ☩Basenadi kebu ta da vetumaganaga 'ida wata bani'odi nua'avada, tovemata'wana'wana wata tosakona. Bunu 'ana nuanua sakoidi wata sosoana-'avo'avovo nuada i 'ewadi 'wa da vo i da yagonida. Tutuya matatabuna ta totolive'eda nuanuada tomotoga vita i na veveluagadi, ta veve'unumagigi, 'ifwaidi tomotoga i veve'eduogaogaleda we'e 'ida ta vedumwe'ai'aiedi.

**4** ☩Siwe tutuyanina Yaubada 'ada To'ita'ita'i yana nuakalikali wata yana 'anivelena i souyen i Iesu 'wainega, i 'ita'ita'ieda.

**5** 'Ita'ita'inina ta veluagaiga, kebu yada folova 'atumaidi ta 'idewadiga 'waidiega, siwe fai i 'isanuakalikali eda. Yada sakona i lekoayavuledi bega ta tubuve'ivau, we'e 'Anu'anunu 'Atumaina 'wainega mia 'ivauna wata 'atumaina ta veluagai.

**6-7** ☩Fai Keliso i 'ita'ita'ieda Yaubada 'Anu'anununina i tauyaotogeni i ageda mogitana bega Keliso yana nuakalikali 'wainega yada sauluva i tonova Yaubada mataneye. Wata yana nuakalikalinina 'wainega mia 'atumaina wata miamia-vagaina ta na veluagai, naninina faifaina ma yada vetumaganaga ta lulukamata.

**8** Vonanidi, vona mogitana.

Nuanuaku naninidi a veifufuyediga 'u na toke 'u na vonedi bega egavo i vetumaganaga Yaubada 'waineye yadi nuanua i na tauyedi

---

◊ **3:2:** 2 Tim 2:23-25   ◊ **3:3:** Efe 5:8-9   ◊ **3:4:** Ion 3:5-7   ◊ **3:6-7:** Mad 25:34

tutuya fuedi folova 'atumaidi i na 'i'idewadi. Naninidi 'atumaidi, wata tomotoga matatabuda 'ada 'aivaita.

<sup>9</sup> Tomotoga fuedi i veveifufu nani-avo'avovo faifaidi, i nuanua tubulelelegidi 'adi 'aseta faifaidi, i veve'ikwayekwayega, wata ve'etobodanidi i mai Mosese 'wainega, 'adi vemamatayakayaka faifaidi i veve'alamagi'ai. Ve'ikwayekwayeganidi kebu 'ada 'eba 'aivaitaga, 'waidiega vita i sousouyedi bega 'omu 'u na kekesedi.

<sup>10</sup>  $\diamond$ 'Ai'edi aitoi yana vona 'wainega tovetumaganavo i na ve'ikwayekwayega bega ve'idi'idi i na souyeniga, tutuya 'ailuga 'u na talaboden, 'ai'edi kebu i na 'ailovega 'u na bailenimo.

<sup>11</sup>  $\diamond$ 'U na bailenimoga fai tomotoganidi bani'odi, nuadi 'oka'okadi, yadi sakona 'waidiega ta na 'asetadi taunidi tovekali.

### *Faulo yana vona 'ana 'eba ve'a'ava.*

<sup>12</sup>  $\diamond$ Sai'afoga Atimasi 'alo Tikiasa a na vetunei i na wai, i na le'waga 'omu 'u na vewavawawa 'u na mai Nikofoli fai a nuanua nuanuaku kaukau 'ana tutuye a na wai bei ta na miamia.

<sup>13</sup>  $\diamond$ Wata 'u na vewavawawa Sinasi taunina veimea 'adi to'aseta wata Afolosa 'u na 'ivaised bega i na tauya yadi nago faifaina. 'Ai'edi i na 'usa nani 'ifwaidi 'waidiega, tovetumaganavo 'u na vonedi i na 'ivaised.

<sup>14</sup>  $\diamond$ I lubwainedi yada tomotoga i na vewavawawa tutuya fuedi i na folofolova 'atumaina bega 'ai'edi taunidi 'alo tomotoga

---

$\diamond$  **3:10:** Mad 18:15-17    $\diamond$  **3:11:** 1 Tim 6:3-5    $\diamond$  **3:12:** Efe 6:21-22

$\diamond$  **3:13:** Fol 18:24    $\diamond$  **3:14:** Efe 4:28

'ifwaidi i na 'usaga, i na 'i'ivaisedi. Nuanuaku yadi mia ma vuagina.

**15** Tomotoganidi taiadi 'a miamianiga, matatabudi i vekaiwa 'waimuye. Yama vekaiwa 'u na lu'ivona edavo tovetumaganavo 'waidie.

A vevelu'ui faifaimi, nuanuaku Yaubada ma yana nuakalikali i na vevesauluva 'atumaina matatabumi 'waimie.

'Asa'aiana bani'odi,  
Yau Faulo.

**YAUBADA YANA VONA'AWAUFAUFA 'IVAUINA  
The New Testament in the Iamalele Language of Papua  
New Guinea**

**Nupela Testamen long tokples Iamalele long Niugini**

copyright © 1984, 1988 Wycliffe Bible Translators, Inc.

Language: Iamalele

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-20

---

PDF generated using Haiola and XeLaTeX on 18 Apr 2025 from source files  
dated 31 Aug 2023

db771331-f438-5051-a7d5-80ea6197c078